

AD OFFICIUM LECTIONIS

Hic est dies verus Dei,
sancto serenus lúmine,
quo díluit sanguis sacer
probrósa mundi crímina.

Fidem refúndit pérditis
cæcósque visu illúminat;
quem non gravi solvit metu
latrónis absolútio?

Opus stupent et ángeli,
pœnam vidéntes córporis
Christóque adhæréntem reum
vitam beátam cárpere.

Mystérium mirábile,
ut ábluat mundi luem,
peccáta tollat ómnium
carnis vitia mundans caro,

Quid hoc potest sublímius,
ut culpa quærat grátiam,
metúmque solvat caritas
reddátque mors vitam novam?

Esto perénne méntibus
paschále, Iesu, gáudium,
et nos renátos grátiae
tuis triúmphis ágrega.

Iesu, tibi sit glória,
qui morte victa prænites,
cum Patre et almo Spírítu,
in sempitérna sáecula. Amen.

AD LAUDES MATUTINAS

Auróra lucis rútilat,
cælum resúltat láudibus,
mundus exsúltans iúbilat,
gemens inférnus úlulat,

Cum rex ille fortíssimus,
mortis confráctis víribus,
pede concúlans tártara
solvit caténa míseros.

Ille, quem clausum lápide
miles custódit ácritèr,
triúmphans pompa nóbili
victor surgit de fúnere.

Inférni iam gemítibus
solútis et dolóribus,
quia surréxit Dóminus
respléndens clamat ángelus.

Esto perénne méntibus
paschále, Iesu, gáudium,
et nos renátos grátiae
tuis triúmphis ágrega.

Iesu, tibi sit glória,
qui morte victa prænites,
cum Patre et almo Spírítu,
in sempitérna sáecula. Amen.

AD TERTIAM

Iam surgit hora tertia,
qua Christus ascendit crucem;
nil insolens mens cogitet,
intendat affectum precis.

Qui corde Christum suscipit,
innoxium sensum gerit
votisque praestat sedulis
Sanctum mereri Spiritum.

Haec hora, quae finem dedit
diri veteris criminis;
hinc iam beata tempora
coepere Christi gratia.

Iesu, tibi sit gloria,
qui morte victa praenites,
cum Patre et almo Spiritu,
in sempiterna saecula. Amen.

AD SEXTAM

Venite, servi, supplices,
et mente et ore extollite
dignis beatum laudibus
nomen Dei cum cantico.

Hoc namque tempus illud est,
quo saeculorum iudicem
iniusta morti tradidit
mortalium sententia.

Et nos amore debito,
timore iusto subditi,
adversus omnes impetus
quos saevus hostis incutit,

Unum rogemus et Patrem
Deum regemque Filium
simulque Sanctum Spiritum,
in Trinitate Dominum. Amen.

AD NONAM

Haec hora, quae resplendit
crucisque solvit nubila,
mundum tenetris exuens,
reddens serena lumina.

Haec hora, qua resuscitans
Iesus sepulcris corpora,
prodire mortis libera
iussit refuso spiritu.

Novata saecula credimus
mortis solutis legibus,
vitae beatae munera
cursum perennem currere.

Iesu, tibi sit gloria,
qui morte victa praenites,
cum Patre et almo Spiritu,
in sempiterna saecula. Amen.